

## 每週經課朗誦經文(巴克禮台語漢字)2014/01/19

### 共同經課 - 1 以賽亞書四十九章一節~七節

1 諸個海嶼啊，著聽我的話！諸個百姓啊，著留心對遠遠來聽！對我佇胎裡，耶和華就揀召我；對我佇老母的腹肚，伊就叫我的名。2 伊互我的嘴親像利刀，將我囡佇伊的手的致蔭下；閣互我成做磨光的箭，將我囡佇伊的箭袋；3 對我講：你是我的奴僕以色列；我欲因爲你得著榮光。4 我就講：我著磨是空空；我盡力是無利益也無採工。若是我的判斷在佇耶和華；我的報賞在佇我的上帝。5 耶和華對胎裡，造就我做伊的奴僕，欲互雅各歸向伊，互以色列聚集佇伊遐。因爲耶和華看我做尊貴；我的上帝也成做我的氣力。6 伊有講：你做我的奴僕，振興雅各的支派，互以色列中得著保全的倒轉來，這猶是小可事，我欲設立你做列邦的光，做我的拯救者，到佇地極。7 救贖以色列的聖主——耶和華，對彼個互人所看輕、百姓所厭惡、官長所壓制的按呢講：君王欲看見你就起來倚，首領也欲跪拜；這攏是爲著耶和華是真實的，就是以色列的聖者有揀你。

### 共同經課 - 2 詩篇四十篇一節~十一節

1 [大衛的詩，交互樂官。] 我曾吞悞聽候耶和華；伊俯落向我，聽我的求叫。2 伊對通驚的陷坑，對土塵中，牽我起來，互我的腳倚石磐頂，互我的腳步在伍。3 伊互我的嘴唱新的歌，就是謳嘍阮的上帝的。多多人欲看見來驚畏，亦欲倚靠耶和華。4 獨獨倚靠耶和華、無插許個驕傲，以及偏向虛假的人，此號人有福氣！5 耶和華——我的上帝啊，你所行的奇事，以及你對阮所存的念頭真多，袂會對你排列；我若欲提起來講，彼個數額算袂了。6 祭祀及禮物，你無歡喜；你有開我的耳孔。燒祭及贖罪祭你無愛揀。7 彼時我講：你看，我來啦！我的事已經記佇冊裡。8 我的上帝啊，你的旨意我歡喜趁；你的律法佇我的心內。9 我佇大聚會的中間宣傳公義的好消息；我無欲停止我的嘴唇。耶和華啊，這是你所知的。10 我未曾將你的公義蓋密佇我的心內；我已經排列你的信實及你的救恩；我對大聚會未曾隱囡你的慈愛及誠實。11 耶和華啊，求你毋通對我停止你的慈悲！願你的慈愛及誠實常常保護我！

### 共同經課 - 3 哥林多前書一章一節~九節

1 對上帝的旨意，受召做耶穌基督的使徒保羅，及兄弟所提尼，2 批寄互上帝的教會佇哥林多的，就是恁佇基督耶穌成聖、受召做聖徒，以及見若逐所在求叫咱的主耶穌基督的名的。主是 in 的，也是咱的。3 願恁對咱的父上帝及主耶穌基督得著恩典、平安。4 我常常替恁感謝我的上帝，是爲著上帝的恩典佇耶穌基督曾賞賜恁的；5 因爲恁恁佇伊逐項代誌富足，口才、智識無毋齊備，6 親像基督的干證，得著堅固佇恁的中間，7 致到恁佇諸個恩賜無一項無夠額，來聽候咱的主耶穌基督的顯現。8 伊也欲堅固恁到路尾，佇咱的主耶穌基督的日無通嫌。9 上帝是信實，恁對伊受召，來及伊的子——咱的主耶穌基督結聯。

### 共同經課 - 4 約翰福音一章二十九節~四十二節

29 隔日，約翰看見耶穌就近伊，就講：「你看，上帝的羊羔，就是擔當世間的罪的！30 此個就是我所曾講：『有一人隨尾我來，成做我的代先，因爲伊本代先我佇咱。』31 我本毋識伊，獨獨欲互伊顯明佇以色列人，所以我來用水行洗禮。」32 約翰閣干證講：「我曾看見聖神，親像鴿仔對天降落，歇佇伊頂面。33 我平素毋識伊，獨獨差我用水行洗禮的，給我講：『你看聖神降臨，歇佇伊頂面，伊就是用聖神行洗禮的。』34 我曾看見，來干證此個是上帝的子。」35 閣隔日，約翰及伊二個學生佇。36 看見耶穌佇行，就講：「你看上帝的羊羔！」37 彼二個學生聽伊所講，就隨耶穌。38 耶穌越轉身，看 in 佇隨伊，就給 in 講：「恁佇尋甚麼？」in 給伊講：「拉比，你恁佇叨落？」（拉比翻譯就是先生。）39 耶穌給 in 講：「恁來就會看見。」in 就去看伊所住的所在，彼日及伊相及住；彼時約略四點鐘。40 聽約翰的話來隨耶穌的二人，其中一個是西門彼得的兄弟安得烈。41 伊代先抵著 in 兄弟西門，給伊講：「阮已經抵著彌賽亞。」（翻譯就是基督。）42 就導伊就近耶穌。耶穌看伊，講：「你就是約翰的子西門，你欲稱做磯法。」（翻譯就是彼得。）